

# TUSI TAIALA

---

MO LE PULEA MA LE VA'AIA LELEI O I'A MA  
FIGOTA

---

O LE AFIO'AGA O

## MATAUTU FALEAPUNA

Aso 16 Mati, 1998

**SAUNIA:**

Pule mamalu a Alii ma Faipule ma tagatanuu o le Afioga o Matautu Faleapuna, ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

**FA'ALUPEGA O  
MATĀUTU FALEĀPUNA**

**Afio mai oulua Gafa  
Maliu mai Too o le Fua  
Susu Suafa ma Alo o Sina  
Alalatai le Ailaoa**

# FAASOLOGA

<b>1</b>	<b>UPU TOMUA</b>	<b>4</b>
<b>2</b>	<b>AUTU</b>	<b>4</b>
<b>3</b>	<b>FAAMATALAGA E UIGA I LE AFIOAGA</b>	<b>4</b>
<b>4</b>	<b>FAIGAFAlVA MA ITUAlGA FAIGAFAlVA TAATELE</b>	<b>5</b>
<b>5</b>	<b>TULAFONO I ASO UA MAVAE MA ASO NEI</b>	<b>5</b>
<b>6</b>	<b>TAPENAGA</b>	<b>6</b>
6.1	Feiloaiga Muamua	<b>6</b>
6.2	Vaevaeina i Vaega	<b>6</b>
6.3	Komiti Faufautua	<b>7</b>
6.4	Fono Mulimuli	<b>7</b>
<b>7</b>	<b>FUAFUAGA FAATAATITIA</b>	<b>7</b>
7.1	Faasaina faigafaiva le-talafeagai : fanai'a, ava niu-kini, vaila'au oona	<b>7</b>
7.2	Ia faasalalauina Tulafono a le Afio'aga	<b>8</b>
7.3	Ia faasaina Upega ma Tili mata-nini'i	<b>9</b>
7.4	Ia faasaina tu'iga ma fa'amo'a	<b>9</b>
7.5	Ia aoina mai i uta Alamea ma faatama'ia ai	<b>10</b>
7.6	Ia faasaina ona toe lafoai lapisi i le sami ma le vai	<b>11</b>
7.7	Ia faasaina faigafaiva mai isi afioaga	<b>11</b>
7.8	Ia faasaina le fulifulitu ma lauina mo apitagalu	<b>12</b>
7.9	Ia taofia le la'uina o i'a ma figota laiti	<b>12</b>
7.10	Iloiloina le gataifale mo se vaega faasaina	<b>13</b>
7.11	Ia unaia faigafaiva i tuā'au ma aoaoga mo faigafaiva	<b>13</b>
7.12	Ia faaaogaina le Mana o Talosaga	<b>14</b>
<b>8</b>	<b>TALOSAGA</b>	<b>15</b>
<b>9</b>	<b>TOE ILOILOINA O LENEI FUAFUAGA TATAU</b>	<b>15</b>
<b>10</b>	<b>UPU MULIMULI</b>	<b>15</b>

## **1. UPU TOMUA**

O faigafaiva i Samoa e taua tele aua o se tasi lea o auala e maua ai le fofoga taumafa, aemaise lava i alalafaga ma afioaga i tua. O le tele o afioaga latou te le o faatauaina le vaaia lelei o le tamaoiga ma le siosiomaga o le gataifale. O le faia ma le faaaogaina o ituaiga faigafaiva faa-ona-po-nei, e iai mea manava, upega ma tili mataninii, ma vailaau oona, e faamata faigofie ma tele i'a maua, ae e ogaoga lo latou faaleagaina o le siosiomaga o le gataifale ma ona tamaoiga. O le faatinoina foi o atinae i luga o le gataifale, ua faaleagaina ai le tele o nofoaga mo i'a ma figota, aemaise le miliona o meaola o le gataifale.

O le polokalame o le faasaoina o le gataifale, na amata mai e le Ofisa o Faigafaiva i le tausaga e 1995. O le faamoemoe o le polokalame, ina ia tapu'e mai le tamaoiga o le gataifale, ma puipuia ai le siosiomaga. O taualumaga o le polokalame, e aofia ai le soalaupuleina ma le fausiaina o se Tusi Taiala. O lenei Tusi Taiala, o loo tamauina ai fuafuaga faataatitia a le Afioaga ma le Ofisa o Faigafaiva. o nei fuafuaga faataatitia e una'ia ai le pulea lelei ma fuafua tatau o le faaaogaina o le tamaoiga o le gataifale o Matāutu Faleapuna.

## **2. AUTU**

O le autu lenei sa faatalatalanoaina ma malilie autasi iai vaega taitasi o le afioaga

- **Ina ia Puipuia le Siosiomaga o le Gataifale.**
- **Toe faatupulaia I'a ma Figota mo tupulaga o le lumanai.**

Ua ioeina e le fonotaga a le Komiti Faufautua mo le Va'aia Lelei o i'a ma figota (KFVL) i le Aso 4 o Mati 1998, o le Komiti (KFVL) lava lenei latou te faamalosi ma unaia vaega eseese uma o le afio'aga auā le puipuia ma le faasaoina o atinae ma alamanuia o le gataifale o Faleapuna. O lenei foi Komiti o loo gafa ma le tapenaga o tulafono aemaise o vaega uma e tatau mo le fuafuaga tatau. O le tele foi lenei tapenaga o le a tuuina atu i le pule mamalu a Alii ma Faipule mo le pasiaina. O lenei fuafuaga ua faamoemoe ina ia oo atu i le tolu tausaga o loo fa'aaogaina pea ae peitai afai ae iai se suiga, ua ao loa ona toe su'esu'eina lenei fuafuaga.

## **3. FAAMATALAGA E UIGA I LE AFIOAGA**

O le afio'aga o Matautu Faleapuna e i le itu i mātū i sasae o le motu o Upolu. O le faitau aofa'i o tagatanuu o lenei alalafaga e tusa ma le 600 i le 650 i latou o lo'o alaala ai. O lenei faitau aofa'i e le o faitaulia ai i latou ua malaga atu i atunuu mamao e pei o Amerika, Niu Sila, Ausetalia ma isi atunuu e nonofo mau ai.

O le afio'aga lenei o Matautu Faleapuna e iai lona a'au mai le itu i sasa'e se'ia pa'ia le itu i sisifo i le umi e tusa ma le 1200 i le 1250 mita. O le mamao o le a'au mai le matafaga e tusa ma le 100 i le 150 mita.

O lenei afioaga, e mamalu tele ona pulega, aua e puleaina lava e le Fono a Alii ma Faipule o le afioaga. O le aumaga e lava saunia i taimi uma mo le tautuaina o matai. O tina latou te avatua fautuaga lelei mo ni mataupu tau lotoifale o le afio'aga.

#### **4. FAIGAFAIVA MA ITUAIGA FAIGAFAIVA TAATELE**

O Matautu Faleapuna e faalagolago tele i le gataifale mo le mea-taumafa. Ua mafua lenei mau, ona o le faitauaofai o tama tane latou te fagotaina le gataifale i le sili atu ma le tasi le aso o le vaiaso, e 20 – 25; ae e 20 – 22 tina ma tamaitai fagogota. E le gata i lea, ae iai foi i latou o loo latou fagotaina tua'au o le afioaga, o ni tagata ia se toa 10 i le 15 lo latou faitau aofai.

E 3 – 5 paopao e faaoga e le au-faifaiva mo fagotaga ma faigafaiva. O le faafitauli o loo feagai nei ma le afioaga, ma o loo latou talosagaina foi i le Ofisa o Faigafaiva, o se alia fagota lea e faa-faigofieina ai fagotaga i tua'au mamao. O le afioaga lenei, e faatagaina soo se tagata mai isi afioaga tua'oi ona fagogota ai i lo latou gataifale.

O le faatinoina o faigafaiva i le afioaga, e iai faiva ua iloga ma o loo faatinoina lava e le au-fagogota i aso uma mo meataumafa. O faiva taatele nei i le afioaga, e iai le mata, fana, uaua, seu, ma le matau, ma o i'a lava nei e masani ona maua ai i o latou faiva, e iai le alogo, fuga, malau gatala, ma mataleele. Na ta'ua e le afioaga, ua faigata tele nei vaitau, ona ua umi ma tele se taimi e faaaluina mo fagotaga, faatoa maua ni i'a. O aso ua tuana'i pe tusa o le sefulu tausaga ua te'a, sa na o le 30 minute i le 1 le itula sa faatinoina ai ni faiva, ona maua lea o le anoano o i'a; a'o nei vaitaimi, ua sili atu i le 2 – 3 itula e faaaluina i fagotaga, faatoa maua ni nai i'a ma ni figota. O le faafitauli ogaoga ua tulai mai ma ua va'aia i le gataifale, ua tau leai ni i'a maua ma ni figota i ogasami o Faleapuna.

#### **5. TULAFONO I ASO UA MAVAE MA ASO NEI**

**(Fesootai ma le Siosiomaga o le Gataifale ma Faigafaiva)**

**Tulafono a le afio'aga o Matautu Faleapuna i aso ua mavae**

O le faasaina o faigafaiva le talafeagai:-

- ♣ Fanai'a
- ♣ Ava niukini
- ♣ Vailaau oona

O nei tulafono o loo faamamaluina ma amana'iaina e pei ona sa iai i le taimi muamua faatoa faamamaluina ai i totonu o le afio'aga o Faleāpuna. Ae peitai e le o mamalu i nei vaitaimi ona o le le amana'iaina e isi tagata o le afio'aga, atoa ai ma isi afio'aga o nei tulafono.

O nisi o mafua'aga e pei ona ta'ua e aofia ai:

- ♣ Le leai o se lagolago mai le Malo
- ♣ O nisi tagata o loo mafaufau mo le taimi nei ae le o mafaufau i le taimi o i luma faapea foi le lumana'i o tupulaga.

O nei mafuaaga uma o loo a'afia i le Fuafuaga mo le Pulega o le Siosiomaga o le Gataifale ma le Va'aia Lelei o i'a ma figota.

E le gafatia na o le malosi faa-letulafono a le Malo ona malu puipuia le siosiomaga o le gataifale

ma ona tamaoiga. E utiuti tulaga tau tupe ma to'agaogao foi le aufaigaluega a le Malo latou te faamalosia ma una'ia tulafono tau faigafaiva i nuu taitasi o Samoa. O le fofō talafeagai o loo i 'a'ao o tagata o loo soifua ma alaala i le afio'aga faatasi ai ma le faamalumaluga a le Fono a Alii ma Faipule. O lenei tali o le a le pine ona una'ia tagata latou te galulue faatasi ina ia malupuipua ma faaleleia le siosiomaga o le gataifale ma ona tamaoiga mo nei ma tupulaga o le lumanai.

## 6. TAPENAGA

O lenei tapenaga sa saunia lava e tagata o le afio'aga o Faleapuna, faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se ootoga lenei o le tapenaga o le Pulega o le Siosiomaga o le Gataifale ma le Va'aia Lelei o i'a ma figota.

### 6.1 Feiloaiga Muamua

O lenei feiloaiga muamua, sa faafesootaia lea e Apulu Sefo Ponoti i le Aso 27 o Me 1997. O Aukuso i lona Aso 09, sa tauaofia ai le uluai fono a sui o le Ofisa ma le Afio'aga mo le faamalamalamaina ma le taliaina o lenei polokalame.

### 6.2 Vaevaein i Vaega

O vaega sa vaevaeina iai e aofia ai Matai, Aumaga ma le Komiti a Tina ma Tamaitai. Sa feiloai nei vaega e tolu ma sui o le Ofisa o Faigafaiva ma faatalatalanoaina ai faafitauli o le gataifale o loo alia'e i le afio'aga atoa ai ma ni fofō talafeagai e faaono foia ai nei faafitauli.

#### Sui auai o le Afio'aga i le uluai fono

#### **Vaega Matai:**

Fiaoka Manuele	Savusa T	Lauvale S
Lilo A	Fainuulua	Lauvale O
Tulai L	Vaitilofia T	Lenuu T
Lauvale T	Tiavo N	Pasui S
Aimainu K	Sivaipoloa F	Lauvale I

#### **Vaega Tina:**

Meto Sale	Faii Mamea	Vito Lauvale Ilialio
Valu Lenuu Tonea	Lilia Falesa	Feagiai Kelepi Sale
	Teleise Leniu Hunt	

#### **Vaega Aumaga:**

Leiloga Tulai	Enokati Peai	Moeai Tuai Mose Pa
Toniu Lauulu	Kilisi Lauvale	Mulu Moe
Simeona Lauulu	Ati Vaitilofia	Mu Iofi
Tini Tiavo S	Faasega Fotualii	Kelepi Savusa
Tusiga Autu	Alo Vaitilofia	Pita M
Pouono Lenuu	La Tiavo	Mulivai Maeataanoa
Vili Iofi	Solo Lano	Soloele Leaupepe
Palate Tuailotoa	Puga Leti	Lotofou Savusa
		Keleni

### 6.3 Komiti Faufautua o le Faasao

I lenei Komiti o loo aofia ai sui na filifilia mai i vaega taitasi, latou te molia finagalo fa'aalia o

vaega eseese i le fonu a le Komiti. O lenei Komiti latou te tuufaatasia faamaumauga ma faamatalaga mai i nei vaega taitasi ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Va'aia Lelei o i'a ma figota. O lenei fuafuaga o loo aafia ai lagona o tagata o le afio'aga i le puleaina o Faigafaiva ma le siosiomaga o le gataifale.

### **Sui o le Komiti mo le Va'aia Lelei o I'a ma Figota**

#### **Komiti Matai:**

Lauvale Sili (peresitene)

Fainuulua Muavae  
Lauvale One

Lauvale Tositino  
Fainuulua Emelio

#### **Komiti Tina:**

Felila Muavae  
Lauvale Rosa

Fofoga Lauvale

#### **Komiti Aumaga:**

Poutoa Taavao  
Tuauaga Leti

Eneliko Lauvale  
Vilo Maiava

## **6.4 Fono Mulimuli**

O le a tauaofia lenei Fono i le Aso 16 Mati, 1998 mo le taliaina, fautuaina, atoa ai ma se teuteuga o le fuafuaga muamua o le Pulega o le Siosiomaga o le Gataifale ma le Va'aia Lelei o i'a ma figota. O le a filifilia foi se Komiti mo le Va'aia Lelei o i'a ma figota (KVL) i lenei fonotaga.

## **7. FUAFUAGA FAATAATITIA**

O fuafuaga faataatitia o ni gaoiga ua faamoemoe e faaono foia ai faafitauli ua fa'aalia ma faailoa mai e vaega eseese o le afio'aga. E lua ituaiga o fuafuaga faataatitia ua fuafuaina, ma o le fuafuaga ua aupito sili ona taua o fuafuaga faataatitia lea ua fa'aagaga mo Nuu po'o Afio'aga. O le isi vaega o fuafuaga faataatitia ua faamoemoe lea mo le Ofisa o Faigafaiva, ma o lenei fuafuaga o le a tuuina atu ai fautuaga ma fesoasoani aua le tapenaina o le faamoemoe e pei ona fuafuaina.

O gaoiga uma lava ua faamoemoe e faatino ai fuafuaga faataatitia mo le Ofisa o Faigafaiva, e ao ona faamaonia e le Faatonu Lagolago o Faigafaiva o le Matagaluega o Faatoaga ma Faigafaiva. O nei fuafuaga faataatitia uma, ua faamoemoe lo latou faataunuuina i le lagolagosua mai o le afio'aga ma ona tagatanuu. O fuafuaga faataatitia uma o le a leai se aafiaga tuusao a le Ofisa o Faigafaiva, ua iai le faamoemoe, o le a fa'auau pea ona tuuina atu ni fesoasoani i le afio'aga e ala atu i pepa o faamatalaga atoa ai ma le faia o ni tautalaga i vaega eseese e pei o aoga ma faalapotopotoga faa-le-ekalesia.

### **7.1 Faasaina faigafaiva le talafeagai: fanai'a, ava niukini ma vailaau oona**

#### **Otootoga**

O nisi o auala tau faigafaiva ua mautinoa lo latou tulaga ogaoga i le faatamaiaina o le alititai (amu) ma le tele o meaola o le gataifale, ma o se faataitaga o nei ituaiga o faigafaiva le talafeagai e pei o vaila'au ta-lavalava, ava niukini ma fanai'a. Ua le gata ina faatama'ia ai se vaega tele o le alititai (amu), ae ua faapena foi ona faaumiumi ai se taimi e mafai ai ona toe faatupuina le tele o meaola o le gataifale ua aafia ma mamate i nei ituaiga o auala faafaigafaiva.

A faaleagaina le alititai, o lona uiga o le a leai ni i'a ma ni figota e toe maua ai.

### **Fuafuaga Faataatitia a le Afio'aga**

Talu ai ona o le tulaga pagatia ua iai le gataifale o lenei nuu o Faleapuna, o lea ua a'e ai se finugalo autasi i le Komiti (KFVL) ua filifilia ina ia toe faamalosia tulafono a le afio'aga sa faia i aso ua mavae, e faasaina ai faigafaiva le talafeagai e pei o fanai'a, ava niu kini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a Alii ma Faipule faatasi ai ma le lagolagosua a tagatanuu o le afio'aga. O faasalaga uma foi ua taua, sa faamautuina lava e le Komiti ma lo latou manatu, ina ia mafai ona utagia e le afio'aga ma soo se tagata nei tulafono, pe afai o le a pasiaina e le pule mamalu a Alii ma Faipule.

### **Fautuaga**

Ia toe faamalosia ma faamamaluina tulafono ua ta'ua i lalo a le afio'aga mo le faasaina o faigafaiva le talafeagai.

### **Tulafono**

Mo le mamalu o le atunuu atoa ai ma tagatanuu o Faleapuna

Ua matua faasaina lava faigafaiva le talafeagai e pei o fanai'a, ava niukini, ma vailaau oona i gataifale o Faleapuna.

### **Faasalaga**

Mo tagata o le afio'aga e solia lenei tulafono, o le a faasalaina i latou o le a faatinoina le vaila'au oona ma le ava niukini i le \$200, ao e o le a faatinoina le fana'ia o le a molia sao i le tulafono a le Malo.

O tagata mai isi afio'aga o le a molia sa'o i le tulafono a le Malo.

### **Taimi Fautuaina**

Ina ia aloaia le faamamaluina ma le faamalosia o nei tulafono pe a mavae le Fono tele e pasia ai le Pulega o le Siosiomaga o le Gataifale ma le Va'aia Lelei o i'a ma figota i le Aso 16 o Mati, 1998.

### **Fuafuaga Faataatitia a le Ofisa**

O le a fesoasoani le Ofisa o Faigafaiva mo le faatinoina o fuafuaga faataatitia a le afio'aga, e ala atu i lana polokalame fesoasoani ma aoaoga tau faigafaiva.

## **7.2 Ia faasalalauina tulafono a le Afio'aga**

### **Otootoga**

O faasalalauina i leitio, televise ma nusipepa, o nisi ia o auala talafeagai lelei e momoli atu ai ni feau t'aua aemaise ai o le faalateleina o ni fuafuaga ua saunia. E le gata i lea, o le a silafia ai e le mamalu o le atunuu, malamalama ma manino lelei ai foi i le aotelega o le faat'auina, ma le malu puipua o le siosiomaga o le gataifale o le afio'aga.

### **Fuafuaga Faataatitia a le Afio'aga**

Ua fautuaina e le Komiti (KFVL) le faasalalauina o tulafono a le nuu ua faamoemoe ma fa'aagaga mo le puipuiga o le siosiomaga o le gataifale ma ona tamaoaiga. O le Komiti (KFVL) o le a latou faamaopopoina aemaise le tapenaina o faasalalauina e faatatau i tulafono e puipua ai le siosiomaga o le gataifale ma le va'aia lelei o i'a ma figota.



## **Autu o le Faasalalauga: “Puipuiga o le Gataifale o Faleapuna”**

### **Fuafuaga Faataatitia a le Ofisa**

O tulafono uma a le afio’aga mo le puipuiga o le gataifale, e tatau ona sainia e le Faatonusili o le Matagaluega o Faatoaga ma Faigafaiva ina ia mafai ona avea ma tulafono lagolago (by-laws). O faasalalauga o nei tulafono o le a gafa lea ma le Ofisa o Faigafaiva.

### **7.3 Ia faasaina upega ma tili matanini’i**

#### **Otootoga**

O le faaaogaina o upega ma tili mataninii ua maitauina le tele o i’a laiti ua faatama’ia ai. Ua iai le talitonuga o le a oo atu i se tulaga faaletonu i’a maua, pe a faaauauina pea le faaaogaina o nei ituaiga faigafaiva. O le a oo ina faaititia i’a e mafai ona oo atu lo latou lapopoa e maua ai le avanoa e fanafanau ma tautuufua ai.

#### **Fuafuaga Faataatitia a le Afio’aga**

Ua faailoa mai e le Komiti (KFVL) o le faaaogaina o upega ma tili matanini’i, o se tasi lea o mafua’aga ua faaititia ai i’a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaaogaina i fagotaga i le gataifale o le afio’aga. Ua faapea foi ona faaalua mai e le afio’aga lo latou matua lagolagoina o le tulafono a le Malo ua iai nei mo le faatapulaaina o mataupega ma tili

#### **Tulafono**

Ua matua faasaina lava upega mataninii e i lalo ifo o le 2 inisi (50 mm) lona mata-upega se’ia vagana ai upega tolotolu, ma tili, ia le i lalo ifo o le 1.2 inisi (30 mm)

#### **Faasalaga**

O se tagata o le afio’aga e soli a lenei tulafono o le a faasalaina i le \$200 a lē-usita’ia o le a faaopoopoina le faasalaga, pe afai foi o le a le faataunuuina lava lenei faasalaga o le a molia sao loa i le tulafono a le Malo

### **Fuafuaga Faataatitia a le Ofisa**

O se lagolagosua mai le Ofisa o Faigafaiva e ala i lana Polokalame fesoasoani o le tuuina atu lea o faamatalaga e saga faamautuina ma faamaopoopoina ai lenei tulafono.

### **7.4 Ia faasaina tu’iga ma faamo’a**

#### **Otootoga**

O amu ua maitauina lona taua i le siosiomaga o le gataifale ona ua mautinoa ua avea lea lea nofoaga o i’a ma figota faapea ma nisi o meaola o le sami. Afai o le a afaina pe faatamaiaina amu o lona uiga ua faatamaiaina foi le tele o meaola o loo nonofo ai. Ua faaalua foi, o tu’iga ma faamo’a, o se tasi lenei o ituaiga faigafaiva le talafeagai, o loo ua matua faaleagaina ai amu aemaise o i’a ma figota laiti. Afai ae faaauauina pea nei ituaiga faigafaiva, o le a sili atu ona tele se afaina o amu o loo fai ma ofaga o i’a ma figota o le gataifale.

#### **Fuafuaga Faataatitia a le Afio’aga**

Na faaalua e vaega taitasi o le afio’aga, le tat au ona toe faamautuina le tulafono e faasaina ai tu’iga ma faamo’a i gataifale o Faleapuna, auā ua mautinoa le faaleagaina ai o amu faapea isi

meaola nini'i o le gataifale. Ua matua lagolagoina e le Komiti (KFVL) lenei manatu ma saunia ai loa le tulafono e pei ona ta'ua i lalo.

### **Tulafono**

Ua matua faasaina ona toe faatinoina tu'iga po o faamo'a i gataifale o Faleapuna.

### **Faasalaga Fautuaina**

Mo tagata o le afio'aga e solia lenei tulafono o le a faasalaina i le \$300 a le usita'ia o le a toe faaopoopoina le faasalaga, afai foi o le a le usitaia lava o le a molia sao loa i le tulafono a le Malo.

### **Fuafuaga Faataatitia a le Ofisa**

O le a fesoasoani mai le Ofisa i le faamautuina ma le faamallosia o lenei tulafono. O le a mafai foi ona tuuina atu ni pepa o faamatalaga mo le faamalamalamaina o tulaga uma ua taua. E lagolagoina foi e le Ofisa soo se fuafuaga a le afio'aga ua talafeagai lelei ma le tulafono faale-malo mo le puipuia lelei o le gataifale ma le siosiomaga.

## **7.5 Ia aoina mai i uta alamea ma faatama'ia ai**

### **Otootoga**

O le alamea o se meaola o le ituaiga o le aveau ma e nofo i luga o le a'au. O lenei meaola e na te ai'ina meaola nini'ua ta'ua o polive o loo tutupu mai ai amu. A oo ina faateleina lenei meaola o le a faapena ona latou faatama'iaina se vaega tele o le a'au ma avea ai o se tulaga pagatia o le a feagai ma le tele o meaola o loo faalagolago i le a'au mo nofoaga ma mea'ai. E le mafai ona faaumatia pe tapeina le alamea i le vaevaeina o lona tino i le sami, auā e mafai e nei itu tino ona faatupuina mai ai nisi alamea fou, se'i vagana lava ua aumaia i uta i le pa'umātū e faamagoina ai pe tanuina foi.

### **Fuafuaga Faataatitia a le Afio'aga**

Ua faailoa mai e le Afio'aga o le alamea o se tasi lea o faafitauli o loo iai i le gataifale. E le gata i le faatama'iaina ai o amu, ae a'afia ai foi le soifua o tagata faifaiva, ma ua tuuina atu faa-fautuaga e le Komiti Fautuaga mo le Va'aia Lelei o i'a ma figota (KFVL) ia fautuaga e pei ona ta'ua.

### **Fautuaga**

Ua fautuaina e le Komiti (KFVL) o le aoina mai i uta o le alamea, o le a faatinoina lea e tagata uma o le afio'aga.

### **Fuafuaga Faataatitia a le Ofisa**

E leai se polokalame a le Malo ua fuafuaina e totogi ai le faatama'iaina o le alamea, vagana ai ni fautuaga e fesoasoani atu ai le Ofisa o Faigafaiva i auala talafeagai e tineia ai lenei meaola faalafua, e ala atu i Pepa o faamatalaga ua maea ona saunia.

## **7.6 Ia faasaina ona toe lafoai lalasi i le sami ma le vai**

### **Otootoga**

O le lafoai o otaota poo lalasi i le sami ma le vai, ua avea ma mafua'aga o le faateleina ai o namu ma manunu'a ai nisi o le aufaifaiva i atigiapa, atigifagu, ma uamea. Ua faapena ona avea ma puna'aga o faama'i, ma tulai mai foi o se nofoaga le talafeagai mo le ola lelei o i'a ma figota i le

gataifale.

### **Fuafuaga Faataatitia a le Afio’aga**

Ua fautuaina e le Komiti (KFVL) aiga taitasi o le afio’aga, ina ia eliina ni lua i tuāmaota ma tuālaoa e lafoai iai otaota ma lapisi. Ua talitonu le Komiti o le auala pito sili lea ona saogalemu ma lelei mo le foiaina o lenei faafitauli tau i le lafoaiina o otaota ma lapisi i le gataifale o le afio’aga.

### **Tulafono**

Ua matua faasaina lava ona toe lafoa’i otaota ma lapisi i le sami ma le vai o le afio’aga o Faleapuna.

### **Faasalaga**

Soo se tagata o le afio’aga e solia lenei tulafono, o le a faasalaina i le \$500, a le usitaia, o le a toe faaopoopoina. Pe afai o le a le usitaia lava, o le a molia sao loa i le tulafono a le Malo.

### **Fuafuaga Faataatitia a le Ofisa**

O faamatalaga eseese e faatatau i a’afiaga o le siosiomaga o le gataifale ma ona tamaoaiga, o le a fesoasoani atu ai le Ofisa e fautuaina le afio’aga i le tāua i le teu maluina o lapisi ma otaota i nofoaga talafeagai. O le a tuuina atu foi ni pepa o faamatalaga mo le faalauteleina o le malamalama i ia tulaga

## **7.7 Ia faasaina faigafaiva mai isi afio’aga**

### **Otootoga**

O fagotaga mai isi nuu e faaaogaina ai faigafaiva e le talafeagai e iai, ava niukini, fanaia, vailaau oona, tu’iga ma faamo’a, ua mautinoa le matua faaleagaina ai o le siosiomaga o le gataifale.

### **Fuafuaga Faataatitia a le Afio’aga**

Ua faaalua mai e le Komiti (KFVL) le tatau ona faia o se tulafono e faasa ai nei faigafaiva. O le autu moni o lenei tulafono ona o nei faigafaiva mai isi afio’aga o loo latou aumaia faigafaiva le talafeagai ma fatinoina i lo latou gataifale.

### **Tulafono Faafautuaga**

Ua matua faasaina lava tagata mai isi afio’aga ona toe fagotaina gataifale o Faleapuna e faaaogaina ai faigafaiva le talafeagai, e pei o fanai’a, ava niukini, vailaau oona, atoa ai ma tu’iga ma faamo’a.

### **Faasalaga**

O i latou uma o le a solia lenei tulafono, o le a molia sa’o i le tulafono a le Malo

### **Fuafuaga Faataatitia a le Ofisa**

O le a fesoasoani atu le Ofisa i le faamalositia ma le faamautuina o lenei tulafono.

## **7.8 Ia faasaina le fulifuli-tu ma le lauina mo apitagalu**

### **Otootoga**

O le aveesea mai o amu ma tu mo nisi fuafuaga e pei o le faia o taligalu, ua mautinoa ai le

faaleagaina ma le faatamaiaina ai o le tele o meaola ninii o loo ola faalagolago i ia nofoaga. E le gata i lea ua faaitiitia ai foi puna'aga o mea'ai mo i'a ma figota aemaise o meaola ninii o le gataifale. Ua mautinoa o le faasaoina o tu ma amu, o se fesoasoani taua lea mo le faatupula'ia o i'a ma meaola o le gataifale ma tumau ai le paleni lelei o le olaga faanatura o le siosiomaga.

### **Fuafuaga Faataatitia a le Afio'aga**

Na faaalua i finagalo o le afio'aga le aafia tele o le gataifale ma lona tamaoaiga ona o le fulifuli tu ma le aveeseina o amu tetele. Sa latou ta'ua foi o le a fausia se tulafono e puipuia ai ma faamautuina ai le fuafuaga ua ta'ua i luga. O lenei foi tulafono o le a faamamaluina e le Pule mamalu a Alii ma Faipule o le afio'aga.

### **Tulafono**

Ua matua faasaina lava ona toe faatinoina lenei faiva o le fulifuli tu ma le lauina mai i uta mo taligalu, i gataifale o lenei afio'aga o Faleapuna.

### **Faasalaga**

O i latou uma e solia lenei tulafono, o le a faasalaina i le \$100

### **Fuafuaga Faataatitia a le Ofisa**

O le a fesoasoani atu le Ofisa i le tuuina atu o ni fautuaga e ala atu i pepa o faamatalaga, le taua o le taofia o lenei faatinoga.

## **7.9 Ia taofia le fagotaina o i'a ma figota laiti**

### **Otootoga**

O le fuafua tatau o le fagotaina mai o i'a, o se itu lelei tele ma talafeagai lea mo le faasaoina ma le toe faatupula'ia o meaola o le gataifale. O lenei fuafuaga, o le a mafai ona maua ai le avanoa e i'a laiti e tutupu ma fanafanau ai, i le uluai taimi ao lei aveeseina pe fagotaina mai foi. Afai e fagotaina mai se i'a ae lei o'o i le lapoa (matua) e fanafanau ai, o lona uiga ua leai sona sao mo le isi augatupulaga e sosoo ai. Afai la o le a faaaauai ai pea lea tulaga, o lona uiga, o le a saga faaitiitia pea le faitauaofai o i'a ma figota, ma faasolo lava ina mou malie ese atu.

### **Fuafuaga Faataatitia a le Afio'aga**

Ua faaalua e le Komiti (KFVL) lo latou lagolagoina o le Tulafono o Faigafaiva ua pasiaina nei, o loo aiaia ai fua faatapulaa o le laiti o i'a e tatau ona fagotaina. Na taua foi o le faamalosi o lenei tulafono, o le a iai pea lea i le Pule mamalu a Alii ma Faipule, faapea le Susuga i le Pulenuu ma le Komiti.

### **Tulafono**

Ua matua faasaina ona toe fagotaina i'a laiti mai le gataifale o Faleapuna, e pei ona aiaia i le tulafono a le Ofisa o Faigafaiva 1995.

### **Faasalaga**

Soo se tagata o le afio'aga o le a solia lenei tulafono, o le a faasalaina i le \$100. Afai ae le utagia, o le a molia loa i le tulafono a le Malo.

### **Fuafuaga Faataatitia a le Ofisa**

O le a fesoasoani atu le Ofisa i le tuuina atu o faamatalaga e faamalamalama atili ai lenei tulafono, e auala atu i lana Polokalame o le faalauteleina o mataupu ma aoaoga tau faigafaiva

## **7.10 Iloiloina le gataifale mo se vaega faasaoina**

### **Otootoga**

O se vaega o le gataifale ua faasaoina, e tatau ona le toe aafia i ni faigafaiva. O le avea o se vaega o le gataifale ma vaega faasao, e ao ona aafia ai le malu puipuia o le siosiomaga ma ona tamaoaiga

(i figota ma i'a). O lenei vaega faasao, o le a faasaoina ai amu, a'au faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma puna'aga oo i'a ma figota e mafai ai ona toe faaleleia nisi vaega o le gataifale ua afaina. O le a fanafanau ma tautuufua i'a ma figota o loo aumau i le vaega faasaoina ma tafea atu o latou fua fanau ma faatupuina ai nisi meaola fou i nofoaga ua le maua ai ni i'a ma figota. O le a le pine ona manuia ai i tatou ae faapea foi tupulaga o le lumanai.

### **Fuafuaga Faataatitia a le Afio'aga**

O le afio'aga e ao ona:

- ♣ Galulue faatasi ma lagolagosua i le aufaigaluega a le Ofisa o Faigafaiva, i le faatinoina o le iloiloga o le tulaga talafeagai o se vaega o lona gataifale, e avea ma vaega faasaoina.
- ♣ Talanoaina ma auiliilina le lipoti ma ia faia se faaiuga i le faavaeina o le vaega faasaoina. Afai ae finagalo le Fono i se tasi, poo fuafuaga uma ua ta'ua:
- ♣ Ia faatinoina loa fuafuaga mo le faavaeina o le vaega faasao e pei o le mataituina, tausiga ma le va'aia lelei o se vaega ua atofaina.

### **Fuafuaga Faataatitia a le Ofisa**

O le Ofisa o Faigafaiva a le a:

- ♣ Faatinoina le iloiloga o le tulaga o se vaega o le gataifale e avea ma vaega faasaoina.
- ♣ Saunia le lipoti mo le tuuina aloa'ia atu i le Komiti o le Pulega o faigafaiva ma le Fono.

Afai ae finagalo le Fono i se tasi, poo fuafuaga uma ua ta'ua:

Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le va'aia o le vaega faasaoina o le gataifale a le afio'aga.

## **7.11 Ia una'ia faigafaiva i tuā'au ma a'oa'oga mo faigafaiva**

### **Otootoga**

E mafai ona faaleleia le tamaoaiga o i'a ma figota maua i aloalo, a'au ma vaega o le gataifale ua faaleagaina, pe afai ae faaititia le fagotaina o nei vaega o le gataifale. O se tasi o auala e faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava, aemaise o tuā'au mamao. Ua iai le talitonuga i le Komiti (KFVL), e ao ona una'ia ma faamallosia faigafaiva i tuā'au ma a'au mamao ina ia tuumamaina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ai ona toe faatupula'ia ma faaleleia le tamaoaiga o le tele o vaega o le gataifale, aemaise i le aloalo, ua faaleagaina. Talu ai ona o le tele o nuu e leai ni vaa e talafeagai mo fagotaga i tuaau, o lea ua taumafai ai le afisa o Faigafaiva e saili fesoasoani mo le faafaigofieina o le mauaina o ni vaa talafeagai mo lea faamoemoe.

### **Fuafuaga Faataatitia a le Afio'aga**

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le autautai o le nuu, ma 'ia faatautaia e se Alii Ofisa o Faigafaiva ua iai se tomai faapitoa i mea

tau faigafaiva.

### **Fuafuaga Faataatitia a le Ofisa**

O le a iloiloina e le Ofisa o Faigafaiva manaoga i auala tau faigafaiva e ao ona fesoasoani ai e aoaoina le mamalu o le autautai o le afio'aga. O itu taua o le a a'afia i nei aoaoga e pei o le teuina ma le va'aia lelei o i'a, saogalemu i luga o le sami, tausiga o afi o vaa, faaasuina o i'a, ma isi lava mataupu taua.

#### **Faamatalaga Faaopoopo**

**Vaa mo fagotaga i tuā'au:** O le leai o ni vaa talafeagai mo fagotaga i tuā'au o le ala lea ua avea ma vaegase i le unaia o faigafaiva i tuā'au. E leai se vaa fagota e i le va o le 'alia ma le paopao, ma o se vaa i lea va ua talitonuina o le a talafeagai mo faigafaiva i tuā'au. I saiiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14 - 16ft, ma o lona tau e itiiti ifo o le \$10,000, tuufaatasi iai ma lona afi ma nai mea fagota. O lenei ituaiga vaa e mafai ona faa'auva'aina e ni tagata se toalua pe toatolu foi, ma e mafai ona faaogaina lenei vaa i faigafaiva i tuā'au. O le a fesoasoani le Ofisa o Faigafaiva i afio'aga taitasi, i mea tau nonoga tupe auā le faatauina o se vaa. O le a faia foi ni aoaoga mo le saogalemu i luga o le sami, teuina ma le va'aia lelei o i'a, tausiga o vaa atoa ai ma le faiga o mea fagota.

## **7.12 Ia faaogaina le Mana o Talosaga**

### **Otootoga**

O talosaga ma talitonuga tuufaatasi faa-le-lotu, o se tasi lea o faamoemoega ua talitonuina lona taua aua le puipuia ma le faasaogalemuina o le siosiomaga o le gataifale ma ona tamaoaga.

### **Fuafuaga Faataatitia a le Afio'aga**

O le sao taua o le aufailotu, o le una'ia lea ma faamalosia'au i tagatanuu ina ia latou faatauina le puipuia ma le faasaoina o le siosiomaga o le gataifale ma ona tamaoaga. O se sao taua tele le tuufaatasia o finagalo o tagata ina ia galulue faatasi, ina ia fo'ia faafitauli o loo alia'e mai i le siosiomaga o le gataifale ma ona tamaoaga. Ua lagolagoina foi e le Komiti (KFVL) lenei fautuaga ma fautuaina ai le mamalu o le afio'aga, ina ia mafai ona faia ni talosaga a aiga taitasi i aso uma ma talosia ai le faasaoina o le siosiomaga o le gataifale.

### **Fuafuaga Faataatitia a le Ofisa**

O le a mafai ona tuuina atu ni fesoasoani mai le Ofisa mo le mamalu o le aufailotu e ala i pepa o faamatalaga ma tautalaga ina ia fesoasoani i le tapenaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaga.

## **8. TALOSAGA**

O nei talosaga, sa mafai ona tuuina mai e sui o le afio'aga sa auai i fonotaga ma le Ofisa o Faigafaiva i taimi o faatalatalanoaga i Vaega e Tolu. O talosaga uma foi la ua tuuina mai, sa faamautuina e le Komiti (KFVL) i le latou fonotaga ma le Ofisa. Pe a talafeagai, o nei talosaga o le a mafai ona iloiloina e le Ofisa o Faigafaiva, mo le faataunuuna pe a mae'a le taliaina o leni tusi e le Pule mamalu a Alii ma Faipule i le Fono tele e faia i le Aso 16 o Mati, 1998. O talosaga uma sa tuuina mai o loo faailoa atu i lalo. Faisua Ogasami faasaoina Tilapia (i'a vai).

## **9. TOE ILOILOINA O LENEI FUAFUAGA TATAU**

### **Otootoga**

O lenei fuafuaga ua faaalua ona o se toe iloiloina o lenei Fuafuaga Tatau mo lona aga'i i luma atoa ma lona toe su'esu'eina, ina ia faailoa ai le taua ma le aoga o lenei polokalame i totonu o nuu ma afio'aga. Atoa ai ma se auiliiliga maumaututu i le tula'i mai o galuega fai a le afio'aga ma le Ofisa o Faigafaiva i le faataunuina o Fuafuaga Faataatitia a le afio'aga ma le Ofisa o Faigafaiva, e pei ona ta'ua i luga i lona Vaega 4. O lenei foi iloiloga e lipotia ai le alualu lelei ma ni faaletonu i totonu o le Polokalame, talu ona faavaeina i totonu o afio'aga.

### **Fuafuaga Faataatitia a le Afio'aga ma le Ofisa o Faigafaiva**

Ua iai le maliliega a le Komiti (KFVL) a Faleapuna ma le Ofisa o Faigafaiva, o le a toe auiliiliina lenei Fuafuaga Tatau pe a mae'a le ono (6) masina talu ona pasia lenei tusi i le Fono Tele i le Aso 16 o Mati 1998. O le a toe feutaga'i le Komiti ma le Ofisa i se aso o le a atofaina mo le toe iloiloina, pe a atoa le 6 masina.

## **10. UPU MULIMULI**

O le auai o le afio'aga o Matautu Faleapuna i le polokalame mo le pulea ma le va'aia lelei o i'a ma figota, ua mautinoa ai le manuia o le afio'aga i ni tausaga oi luma. O le manuia ma le alualu i luma o lenei polokalame, e faalagolago tele i le galulue faatasi o le afio'aga; i le pule mamalu a alii ma faipule, komiti a tina, aumaga, aemaise o le Malo, e tau ala mai i le Ofisa o Faigafaiva i le fatinoina o fuafuaga faataatitia ua mae'a soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatali ai i ni talai faaaliali ma sona lelei, o lea e taua ai, mo le silafia e tagatanuu o le afio'aga. O i latou o le a talisapaia ma 'ae'ae i nei manuia o tupulaga o le lumanai o le afioaga. O lea ua a'e ai se tofa i le afio'aga e faia se polokalame faapenei a le malo e Fesoasoani ai e toe tapu'e mai le sosia o le tamaoaga o le gataifale o le afioaga ua tauau ina mou atu.